



Magne Huglen, medlem i Eldrerådet, bed eldre ta kontakt.

Medlem i eldrerådet, Magne Huglen, fortel at han ikkje har blitt kontakta av folk som treng spesiell hjelp i pandemi-situasjonen, og at han håpar at ingen eldre brenn inne med spørsmål. Framleis er ikkje det nye styret i eldrerådet valt, men på Kvinnherad kommune sine heimesider er det sett ein digital møtedato for eldrerådet i starten av april.

Det er fem faste medlemmer og like mange vararepresentantar.

Magne Huglen oppmodar no dei eldre i kommunen til å ta kontakt med han, eller nokre av dei andre medlemene i eldrerådet, dersom det er noko ein lurar på angående den pågåande situasjonen, eller andre innspel ein vil ha formidla til kommunen.

– Vi skal vera eit talerøyr og rådførande organ for dei eldre, og vi håpar ikkje at det er nokon som brenn inne med noko no, seier han over telefonen.

Risikograppa

Både alderen og den nyleg avslutta kreft-benhandlinga gjer at Huglen sjølv, i dobbel forstand, er ein del av risikograppa.

– Eg har snakka med fleire som har sete seg sjølv i heimekarantene eller isolasjon. Det var igrunn planen min også, fortel Huglen.

Eldrerådmedlemen har intrykk av at dei eldre tar situasjonen med fatning, og er flinke til å ta forholdsreglar.

– Dei har vore gjennom eit langt liv, og alle eg har snakka med er flinke til å beskytta seg, forklarar han, som samstundes håpar at dei eldre no får den informasjonen dei treng.

– Eg ser sjølv at det kan vera vanskeleg å følgja med på, og forstå rettningslinjer ein får frå øvre hald. No er mange av dei eldre allereie på nett, men eg håpar at resten også får viktig informasjon.

Han oppmodar nok ein gong eldre med spørsmål om den pågåande virus-situasjonen, eller berre generelle innspel, om å ta kontakt.

– Det er som sagt dei vi er her for, avsluttar den ferske eldrerådmedlemen.

Tekst: Frå kommunen si heimeside

3.12.2020

Uskedal Utvikling

Foto: Grenda
Nett: Kristian Bringedal